

# **Peqqinnissaqarfup aqunneqarnera aaqqissuussaaneralu pillugit Inatsisartut peqqussutaat**

Kalaallit Nunaanni Peqqinnissamik Isumaginnittoqarfik pillugu inatsimmi 369-imi, ulloq 6. juni 1991-imeersumi § 1 malillugu aalajangersarneqarput:

## *Qitiusumik aqutsineq*

**§ 1.** Naalakkersuisut peqqinnissaqarfimmi sulineq aqussavaat, pilersaarusiussavaat nakkutigalugulu.

*Imm. 2.* Naalakkersuisut peqqinnissaqarfimmi inuit suliaminnut atatillugu sulinertik pillugu nalunaarutiginnittaqqullugit nalunaaruteqartaqqullugillu peqqusinnaavaat.

**§ 2.** Peqqinnissamut tunngatillugu sullissinerup ineriartortinneqarnerani Naalakkersuisut pilersaarusiortuussapput ataqtigiissaarisuullutillu.

## *Najukkani pinaveersaartitsinermut ataatsimiititaliat*

**§ 3.** Naalakkersuisut kommunini tamani najukkami pinaveersaartitsinermut ataatsimiititaliamik pilersitsissapput najukkami peqqinnermik aallussinerup pinaveersaartitsinermillu nukittorsassassanik, tamatumani aamma Naalakkersuisut tunngaviliussaasa iluanni:

- 1) Pinaveersaartitsineq aqqutigalugu kommunimi peqqissusermut sunniuteqarneq akisussaaner lu nukittorsassavaat,
- 2) kommunimi pinaveersaartitsinerup peqqinnermillu aallussinerup aaqqissuunneqarnerat tulleriiaarneqarnerallu siuarsassavaat, kiisalu
- 3) peqqinnissaqarfup taakkunungalugu attuumassuteqartut suleqatigiinnerat annertusarlugulu nukittorsassavaat.

*Imm. 2.* Pinaveersaartitsinermut ataatsimiititaliap suliassat inunnut ataasiakkaanut tunngasut eqartut suliarsassanngilai.

*Imm. 3.* Sumiiffinni kommuninut agguataarinerup avataanniittuni najukkami pinaveersaartitsinermut ataatsimiititaliamik Naalakkersuisut pilersitsisinnapput.

*Imm. 4.* Najukkani pinaveersaartitsinermut ataatsimiititaliat inuttalersugaanerat sulinerallu pillugit Naalakkersuisut erseqqinnerusunik malittarisassiussapput.

## *Peqqinnissaqarfup aaqqissuussaanera*

**§ 4.** Nuna najukkani peqqinnissaqarfinnut aggorneqassaaq.

*Imm. 2.* Dronning Ingridip Napparsimmavissua nuna tamakkerlugu napparsimmaviuvoq.

*Imm. 3.* Nunap najukkani peqqinnissaqarfinnut agguataarneqarnera, aaqqissuunneqarnera suliaallu pillugit

kiisalu Dronning Ingridip Napparsimmavissuata nunamut tamarmut suliai pillugit Naalakkersuisut malittarisassiussapput.

*Peqqinnissaqarfimmik Nakkutilliisoqarfik*

§ 5. Peqqinnissamik sullissinermut tunngasut pillugit Naalakkersuisunut oqartussaasunullu allanut siunnersuisarlunilu allatigut ikiuuttartussamik Naalakkersuisut Peqqinnissaqarfimmik Nakkutilliisoqarfimmik pilersitsissapput.

*Imm. 2.* Peqqinnissaqarfimmik Nakkutilliisoqarfup taamatuttaaq Naalakkersuisut peqqinnissakkut pissutsinik sianiginninnerannik ikiussavai inuillu peqqinnissaqarfimmi sulisorisat peqqinnissakkut ilinniakkatik atorlugit sulinerannik nakkutiginninnermigut ikiussavai.

§ 6. Nakorsap peqqinnissaqarfimmik nakkutilliisuutitap peqqinnissaqarfimmi unioqqutitsisoqarsimaneranik amigaateqartoqarneranilluunniit paasisaqaruni pisariaqartitsineq naapertorlugu oqartussaasunut pineqartunut ilisimatitsissaaq. Aammattaaq peqqinnissamut tunngatillugu immikkut pisariaqartoqalersillugu Nakorsaq peqqinnissaqarfimmik nakkutilliisuutitaq tamanut ammasumik paasissutissiisassaaq.

§ 7. Peqqinnissaqarfimmik Nakkutilliisoqarfup sulinera pillugu malittarisassat sukumiinerusut Naalakkersuisut aalajangersassavaat.

*Naammagittaalliuuteqarsinnaaneq*

§ 8. Najukkani peqqinnissaqarfii aamma Peqqinnissamut Pisortaqaqarfup peqqinnissamut tunngasutigut naammagittaalliuuteqarsinnaaneq pillugu innuttaasunut paasissutissiisarnissaq ilitsersuisarnissarlu pisussaaffigaat.

*Atortuulersitsineq*

§ 9. Inatsisartut peqqussutaat manna ulloq 1. august 2000 atulerpoq.

*Imm. 2.* Peqatigalugu Peqqinnissaqarfup siulersorneqarnera aaqqissuussaaneralu pillugit Inatsisartut peqqussutaat nr. 7, 30. oktober 1992-imeersoq atorunnaarsinneqarpoq.

*Imm. 3.* Peqatigalugu Peqqinnissamut ataatsimiititaliat peqqinnissamullu pilersaarusi at pillugit Namminersornerullutik Oqartussat nalunaarutaat nr 38, 15. november 1993-imeersoq atorunnaarsinneqarput. Malittarisassat allat, Inatsisartut peqqussutaat imm. 2-mi taaneqartoq naapertorlugu aalajangersarneqarsimasut, atuutiinnassapput, malittarisassanik Inatsisartut peqqussutaat manna peqqussutilluunniit allat tunngavigalugit aalajangersarneqarsimasunik taarserneqarnissamik atorunnaarsinneqarnissamilluunniit tungaanut.

*Namminersornerullutik Oqartussat, ulloq 23. maj 2000*

Jonathan Motzfeldt

Alfred Jakobsen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut